

**MYEN MUNG KOMYUNIT PATI
GINJAW DAT KASA HPUNG
HTE
WUNPAWNG MUNG DAN SHANGLAWT
HPUNG GINJAW DAT KASA HPUNG
YAN A
MYIT HKRUM TAWN AI LAM.**

(1976 Ning July Shata (6) ya.)

**MYEN MUNG KOMYUNIT PATI GINJAW DAT KASA
HPUNG HTE WUNPAWNG MUNG DAN SHANG-
LAWT HPUNG GINJAW DAT KASA HPUNG
YAN A BAWNGBAN MYIT HKRUM
TAWN AI LAM.**

Myen Mung Komunit Pati Ginjaw Dat Kasa Hpung hte Wunpawng Mungdan Shanglawt Hpung Ginjaw Dat Kasa Hpung yan gaw, 1976 ning June shata laman Myen Mung shalawt da lu sai shara mi hta hkrum bawngban mat wa sai. Hpung lahkawng yan gaw shada nachying hku hkau ai hte asan brang, bawngban jahkrup mat wa nhtawm lawu de na hte maren myit hkrum lam ni hpe lu la sai.

1. Ya aten mungkan a sat lawat rawt jat wa ai lam ni gaw nachying mai kaja nga ai hte mungkan ting na rawt malan (revolution) nga ai mungkan mung shawa dawtsa a lawt lam a matu nachying akyu pru nga ai zawn, ya yang na Myen Mung a rawt malan sat lawat mung grai mai kaja nga ai.

Rawt malan nga ai mung shawa myu baw sang shagu a lawt lam a matu mung akyu grai nga ai ngu, hpung lahkawng yan kaw nna myit la ai.

Mungkinan hta n-gun shadang lai (Super Powers) mungdan rai nga ai Rusha Soshe mung maden hte Amerikan mung maden yan gaw mungkan hpe garan ka-up sha lu na matu, maga mi de shada kashun shing jawng hkat nga ma ai zawn, maga mi de mungkinan mung shawa hpe dip ka-up sai chyup lu na matu shada matut mahkai pawng hpawm nga ma ai. Shan lahkawng dai zawn shada shing jawng kashun hkat nga ai majaw, grau nna Rusha Soshe mung maden wa a wa-dan la ai ma-ja ladat hte shang kashun chyinglau ai a majaw, shara shagu laja lana re ai sat lawat ni hte hpai shai lam ni gaw lani hte lani laja lana byin pru wa nga ai. Mungkinan shinggyim uhpawng hte seng ai hpai shai lam ni gaw laja lana byin pru wa nga ai majaw, nambat masum mungkinan majan byin pru na sat lawat hte mung shawa rawt malan lam ni twi baw ayai wa na sat lawat lahkawng yan byin pru dan dawng wa nga ai. Rawt malan lam ni twi baw ayai wa ai a majaw, nambat masum mungkinan majan byin wa na hpe shingdang lu na mi rai rai, shing n rai, nambat masum mungkinan majan byin pru wa ai majaw rawt malan lam ni twi baw ayai

wa ai mi rai rai, jahtum e, mung maden lailen gaw ga kata lup kau ai hkrum na hte, mungkinan a sat lawat gaw mungkinan mung shawa a rawt malan lam a matu nachying akyu pru nga ai ngu myit la ga ai. Ndai zawn re ai mungkinan sat lawat hta, rawt malan nga ai mungkinan mung shawa dawtsa lawt lu na matu, Rusha Soshe mung maden wa hpe madung tawn ning hkap na hte, Amerikan mung maden wa hpe mung tawk hprut ninghkap let, Soshelit Miwa Gumsan Mungdan e woi awn nga ai mungkinan mung shawa maga de tawk hprut tsap nna gasat poi shang mat wa ra ai ngu, hpung lahkawng yan kaw nna mu mada ai.

Mung kata e, mung maden lailen, gumchying gumsa lamu ga madu lailen, hte byurokret arang madu lailen ni a kasa Ne Win San Yu hpyen asuya hte myu sha baw sang mung shawa a lapran na hpai shai lam ni gaw, lani hte lani laja lana byin pru wa nga ai. Sut masa lam, mungmasa lam, hpyen masa lam hte nga sat nga sa lam ni hta jut magup hku nna yak ginchyum chyat nga lu ai. Rawt malan sat lawat chyawm gaw dai hku n rai, lani hte lani mai kaja wa nga ai. Dai ni Myen Mung kata e ndai zawn re ai npawt nhpang hpai shai lam a mahtai a majaw, Ne Win San Yu hpyen asuya gaw, dai nam yak manghkang lam ni hpe

gara hku mung hparan lu na n re ai sha n-ga, jahtum e ndai hpyen asuya gaw sum agrawp mat wa na sha re. Ndai zawn re ai mung kata sat lawat hta myu sha baw sang mung shawa a lawt lam a matu tai hpyen rum Ne Win San Yu hpyen asuya hpe tawk hprut ning hkap let rawt malan hpung ni yawng myit hkrum mang rum ai hte n-gun gahkyin la nhtawm, hpyen asuya sum agrawp mat wa hkra gasat shagrawt shamyit kau mat wa ra sai ngu hpung lahkawng kaw nna mu mada ai.

2. Myen Mung kata na myu sha baw sang mung shawa hpe dip ka-up sai chyup nga ai tai hpyen madung hku nna hpan masum nga ai. Dai ni gaw, mung maden lailen, gumchying gumsa lamu ga madu lailen hte, byurokret arang madu lailen ni re. Dai re majaw myu sha baw sang mung shawa dawtsa yawng awm dawm lawt lu na matu ndai mung maden lailen, gumchying gumsa lamu ga madu lailen hte byurokret arang madu lailen ni hpe tawk hprut ning hkap let, ru htum hkra ganawng manga jahten sharun kau ra ai ngu, hpung lahkawng yan kaw nna awm dawm myit hkrum sai.

3. Myu sha baw sang mung shawa dawtsa a tai hpyen run Ne Win San Yu hpyen asuya gaw,

mung maden lailen, gumchying gumsa lamu ga madu lailen hte byurokret arang madu lailen ni ngu ai madung tai hpyen hpan masum ting a kasa daju re. Dai lailen n mat ni hpe gahkyin hkrang shapraw tawn ai lachyum mung re. Dai re majaw tai hpyen rum Ne Win San Yu hpyen asuya hpe tawk hprut ning hkap let, sum agrawp kadawng mat wa hkra gasat shagrawt shamyit kau mat wa na matu, hpung lahkawng yan kaw nna awm dawm myit hkrum sai.

4. Tai hpyen rum Ne Win San Yu hpyen asuya hpe gasat shamyit mat wa ai hta, Myen Mung Komyunit Pati hte Wunpawng Mungdan Shanglawt Hpung yan gaw jinghku hku nna myit hkrum gahkyin gumdin let, rawt malan uhpawng kata na madang maren mara hte matut mahkai mat wa na lam hpe, grau shangang shakang mat wa nhtawm, myu sha baw sang mung shawa dawtsa awm dawm lawt lam lu la hkra shada garum shingtau mat wa na hte, hku hku hkau hkau pawng hpawm galaw sa mat wa na sha n-ga, hpung lahkawng a lapran e manghkang ni lama byin pru wa yang mung, bawngban jahkrup ai ladat hte hparan la mat wa na matu, hpung lahkawng kaw nna awm dawm myit hkrum sai.

5. Lahta e madun tawn ai magam lit ni hte shatawng shada tawn ai lam ni hpe, hkrang shapraw mat wa na matu grak lagra galaw mat wa na magam lit ni a lam hpe matut bawngban jahkrup la nhtawm galaw gunhpai mat wa na hku, hpung lahkawng kaw nna awm dawm myit hkrum sai.

6. Lahta de ka madun tawn ai myit hkrum lam hpe myu sha baw sang mung shawa dawtsa de shana shabra mat wa na hte, ndai myit hkrum lam a kata lam myit jasat ni hpe mung seng ang ai mung shawa dawtsa kata dam lada ai hte sung sung aw-law hpaji jaw shana shabra mat wa na matu, hpung lahkawng kaw nna awm dawm myit hkrum sai.

Ndai myit hkrum lam hpe Myen laika hte Jinghpaw laika hpan lahkawng hku ka tawn ai. Dai laika hpan lahkawng yan hpe tara shang ai hku masat shagrin tawn ai.

(*Sd.*) **BRANG SENG**

Tingnyang Up
Ginjaw Dat Kasa Hpung
Ningbaw
Wunpawng Mungdan
Shanglawt Hpung.

(*Sd.*) **BA THEIN TIN**

Tingnyang Up
Ginjaw Dat Kasa Hpung
Ningbaw
Myen Mung Komyunit Pati.

1976 *Ning July Shata* (6) *ya.*